



Sl. tvö ár hafa Fergusonfélagið og Landbúnaðarsafnið haldið saman fundi um dráttarvélar, sögu þeirra og hlut í þróun landbúnaðar um og upp úr miðri síðustu öld.

Þeir Sigurður Skarphéðinsson, formaður Fergusonfélagsins og Bjarni Guðmundsson á Hvanneyri hafa haldið saman fundi í Mosfellsbæ, Skagafirði, Akureyri, Egilsstöðum, Flúðum og á Hvolsvelli þar sem Sigurður hefur kynnt Fergusonfélagið og Bjarni fjallað í máli og myndum byltinguna í sveitunum í kjölfar komu „heimilisdráttarvélnanna“.

Báðir þekkja þeir vel til dráttarvéla, þróunar þeirra og sögu, því Sigurður var fyrr einn helsti viðgerðarmaður fyrir Ferguson- og MF vélar og fór vítt um land í viðgerðarferðir. Bjarna þekkja menn sem kennara á Hvanneyri, umsjónarmanns Landbúnaðarsafnsins og sem bókarhöfund um vinsælustu „heimilisdráttarvélnar“; Ferguson og Farmall. Bjarni hefur á fundunum áritað bækur sínar fyrir menn óski þeir þess, hvort heldur þeir kaupa þær á staðnum eða koma með sínar eigin bækur.

Fundirnir hafa verið vel sóttir og yfir kaffi og kleinum í hléi hefur mikið verið skeggrætt um dráttarvélar, fylgihluti þeirra og jafnvel hvaða vélategund sé sú albesta!

Nú er komið að fundi á Vesturlandi þar sem Bjarni nefnir erindi sitt „**Frá Torfa í Ólafsdal til traktora nútímans...!**“ og ekki gleymast myndirnar því myndefnið er ríkulegt hjá Bjarna.

Ræktunarframfarir og nýja verkmenningu í sveitunum má í mörgu rekja til Torfa Bjarnasonar í Ólafsdal. Svo komu dráttarvélnar af ýmsum gerðum, sem ásamt landbúnaðarjeppanum breyttu störfum og mannlífi til sveita enn frekar og urðu eftirsóttar menningarminjar og hluti þjóðarsögunnar.

Er ekki verið að gera upp traktor í þriðja hverjum bílskúr?

Vesturlandsfundurinn verður **Vogalandi í Króksfjarðarnesi þriðjudaginn 12. mars n.k. kl. 20:30** og eru allir áhugamenn um gamlar dráttarvélar og þátt þeirra í sögu sveitanna velkomnir.

RJ